



Иуданың пічии

Иуда Иерусалимдегі Христос тигірібінің чонын устапчатхан Иаковтың туңмазы полча. (Олар ікізінең Иисус Христостың харындастары).

Позының пічиинде Иуда Христос тигіріблерінің чонын хайдағ ла полза чой үгретчілерден китендірче. Олар Христостың үгредиин саба чоохтап, сайбах хылынып, чуртааннар. Иуда Христос чонын Хан пиге киртістіг польп, иптіг тудынарға сурынча.

Иуданың пічии Петрның ікінчі пічиине уғаа чағын. Че кем пурнада пасханы – Иуда алай Петр – тың на пїлдістіг нимес. Хынза, олар ікізі дее, пічіктерін пасчатханда, үзінчі пічікнең тузаланғаннар.

Иуда пірее көзідімнерні чоохтап, «апокрифтерге» кірчеткен пічіктерге сылтанчатханы хайығ тартча. «Апокриф» тіп грек тілбестеенде ле халған паза еврей пічіктеріне кірбеен пурунғы еврей кинделерін адапчалар. Христиан тигіріблерінің пірееелері пу кинделернің хай піреезін постарының Библияларына кир салчалар.

Алғас

1 Иисус Христостың хулы Иаковтың харындазы Иуда^с пасча. Худай ах-арығ^с иткен, Иисус Христос хайраллапчатхан кізілерге пасчам. ²Өлчей, амыр паза хыныс сірерге хозылып одырзын.

Чой үгретчілердеңер

³Хынғаннарым! Пістің прайзыбыстың пар арачыланызыбыстанар بازارға иткен полғам. Че киртінізібісті хайраллир үчўн, күрезерге көннїлерінні көдірібізерге кирек полчатханын көр салдым. Пу киртіністі Худай хачан-да ах-арығларына пирген нооза. ⁴Худайны улуғлабинчатханнарның пірееелері сірернің аранарға кіріп алғаннар. Олар постарының чөреес ондайларын Худайның

паарсазынаң ахтапчалар паза пістің Ээбіс полчатхан Худайнаң Хан-пигібіс^с Иисус Христосты хыйа итчелер. Ол кізілернің чарғыладарларынаңар Худай Пічиинде^с хачанох пазылған полған.

⁵Сірер мыны пілчеткен дее ползар, мин аны сағыстарыңа хатап кирерім килче: Хан Худай^с Позының чонын, арачылап, Египеттең сығарған, анаң, тізең, киртініс чох полғаннарын чох ит салған. ⁶Худай пирген үлгүдең артых үлгүні аларға идіп, Худай көзіт пирген орынны тастап парыбысхан ангеллерні^с сағысха кирибізіңер. Худай оларны, оот полбас кинчее пиктебізіп, харасхының түбіне тастабысхан. Анда олар Улуғ чарғы күнін сахтапчалар. ⁷Содомнаң Гоморраны паза оларнаң хости турған саарларны сағысха кириңер. Андағы чуртағчыларның, пудурғы ангеллерниөк чіли, ондайлары ардап парған. Олар чөреес паза ойнас хылыхтарына салын сыхханнар. Худай, пасхаларына көзідім идіп, оларны успас отха тастаан. ⁸Пу сын нимес азых чоохтарға^с сабыл парыбысхан кізілернең идөк полар. Олар ит-ханнарын ардатчалар, Худай үлгүзіне тоғырланчалар паза өөркі пастыхтарны сөклепчелер. ⁹Өөн ангел Михаил дее, Моисейнің^с сөөгін кем аларынаңар сайтаннаң^с таласчатханда, иди полбаан, аны чабал сөстернең пыролабаан. «Худай сини чарғылабыссын» тіп чоохтан салған. ¹⁰Пу кізілер постары пілбинчеткен нимені хырысчалар. Аңнар чіли, нимені пілінмин итчелер, пос постарын чох иттірерлеріне ағылчалар. ¹¹Чобағ оларға түссін. Олар Каиннің чолынча парчалар нооза. Ахчаох үчүн, Валаам чіли, алчаас итчелер. Корей чіли удурласчалар, олох чіли, өл парарлар. ¹²Сірер хада азыранчатхан чыылығларда олар суғ алтындағы хайалар осхас хорғыстығлар. Чоо сабыныбызарға үр нимес. Олар чил сұр чөрген, наңмырлары чох пулуттарға, күскүде дее чистек пирбинчеткен, чирдең ходырыл парған ағастарға төөйлер – тірілбеске өліглер. ¹³Оларның уйадыстығ киректері, хазыр талай салғағының үстүнде чайхалчатхан көбігі чіли, харахха іле көрінчелер. Олар орыннарын тастаан чылтыстар. Худай андағ чылтыстарға харасхының түбінде хачанға даа орын тимнеп салған. ¹⁴Адамның^с соондағы читінчі уйазынаң сыххан Енох пу кізілерденер піди ухаанчылаан: «Түбен саннығ ах-арығ ангеллерінен хада Худай килер. ¹⁵Ол прайзын чарғылир. Ол Позынаң тоғыр иткен киректернің паза чазых^с иткен кізілернің хомай сөстерінің үчүн, хатығласха прайларын чарғылап салар». ¹⁶Андағ кізілер

хачан даа чөпсееренмин чөріп, удур-төдір пыролазадырлар. Олар хан ойназына тартыл чөрібісчелер, көкеесімненізіп, махтанысчалар, пос тузазын на сағынып, чойырхап чөрчелер.

Сизіндіргені паза үгреде чоохтааны

¹⁷Хынғаннарым! Хан-пигібіс Иисус Христостың илчїлері^с алында чоохтаан чоохтарын ундубаңар. ¹⁸Олар сігерге піди теен полғаннар: түгенчі тус чит килзе, сігерні сөклепчеткен, чабал хынығыстарына тартылчатхан кізілер сығызарлар. ¹⁹Ол кізілер чонны ыырластырчалар. Постарының на көңнілерін пілчелер. Олар Худай Худы^с чохтар. ²⁰Хынғаннарым! Пістің ах-арығ киртінізібісте пик турыңар, Худай Худы чоохтаан нимеденер пазырыңар. ²¹Худай хынызы сігерні толдырар иде чуртаңар. Иди чуртап, Хан-пигібіс Иисус Христостың, сігерні айап, мөгі чуртас^с сігерге пирерін сағыңар. ²²Хомай иткен кізілерге айаңар, че оларның киректерін чарғылаңар. ²³Пасхаларын, чазых итчеткеннері үчүн хорығып, арачылаңар. Чалынның оттаң оларны сығара тартыңар, че чазых кірлеен кип-азахтарына теңерге дее хорығыңар.

Прай сабланыс Худайға

²⁴Сігерні киртіністең хыйа парыбызарыңаң арачылапчатхан паза Позының сабланызына сігерні өріністіг, пір чазых чох ағыл полар Худайны сабландырыңар. ²⁵Прайзыңаң хыйға Чалғыс Худайыбысха, Иисус Христос Хан-пигібістең пастыра пісті арачылапчатхан Худайыбысха сабланыс ползын. Ол илбек. Пастағызыңаң ала хачаңға даа Аның күзі паза үлгүзі пар. Аминь^с.